

Bürgermeister und Rat zu Lütjenburg

bezeugen, daß Jakob Mestemaker, Parochus daselbst, der Vikarie am Altar an der Süderseite zunächst der Sakristei ein Kapital von 30 Mark Lüb. nebst der Rente davon im Betrage von jährlich 2 Mark überlassen habe. (1493, den 27. August.)

Mitgeteilt von Pastor WITT in Preetz.

Wii Borgermestere v. Raetmane der Stad Lutkenborgh Bekennen v. betugen openbar in v. myt dessem breue vor Alßweme, dat de erlike man, her Jacob Mestemaker, nv tor tijd vnße kerkher, v. hefft myt gudem vrigen willen vor vns vorlaten v. vorleth gegenwardigen in v. myt krafft desses breues dem erliken manne hern Marquard molre, vicarieße in der kerken Lutkenborgh vorscr., v. synen nakomelingen dortich Lübesche mark penninge houetstoles v. Twe mark ewige jarlike renthe, dede scholen tobehoren to des erbenomeden hern marquardes molres vicarie, der he nv tor tijd eyn besitter is v. de Selige her Nicolaus Rost vor em de leste besitter was der sullften vicarie to dem Altare in der zuder ziiden negest der geruekamer in der kerken to lutkenborgh vorscr. belegen, welker dortich mark houetstoles vorscr. v. Twe mark ewige jarlike rente dem vorgenom. her Jacob Mestemaker toegescreuen weren in vnßer Stad boke v. nv dem erben. Her Marquard Molre v. synen nakomelingen, dersuluen vicarie vicarießen, in vnßer Stad bok vorscr. hebben toegescreuen laten in desser nascreuen wise: Alße jnterste Hans smid Teyn lubesche mark penninge houetstoles in v. vtthe synen Twen drompt zaet ackers v. synem hoppenhaue, belegen in dem elreholte, dat ene drompt zaet ackers belegen by dem Rugenberge, v. dat ander drompt zaet ackers belegen by dem budendijke, Eluen schillinge v. Soeß penninge jarlike ewige rente. Jtem Clawes hermens, vnße borger, viiffmark houetstoles v. Sostehalue schillinge jarlike ewige rente in v. vtthe synem Eyn drompt zaet ackers, belegen by dem wege na der Neddermolen negest Hinrich Ringsteden acker. Jtem in v. vtthe Hans Meckelenborges Hoppenhaue voffteyn mark houetstoles v. Ene mark ewiger jarlike renthe, den nv hebben vnße borgere Clawes meckelenborgh v. Tymmeke grummer. V. hebben alle desse vorscreuen, Hans Smid, Clawes Hermens, Clawes Mekelenborgh v. Tymmeke grummer, vor vns gewillekoret v. gelouet, dat eyn islick fruntliken alsodan vorscreuen rente wol to dancke betalen wil v. schal alle jar in den achte dagen der hilgen drier koninge dem vorben. her Marquard Molre v. synen nakomelingen, vicarießen der suluen vicarie, sunder alle argh in guden truwen stede v. vast wol to holdende. Jodoch desuluen vorben. vnße borger v. ere eruen hebben myt erben. hern Marquardo v. allen synen nakomelingen de gnade v. willen beholden, dat ze de suluen Twe mark jarlike rente mogen wedder kopen, wen en dat beqweme is, myt den vorscr. houetsumme, also Dortich mark, eyn islick syn andeel, also vorscr. is, in den achtedagen der hilgen dryerkoninge, So verne ze En eyn halff jar touorn de losinge witliken voorkundiget hebben,

denne to betalende de vorscr. houetsummen myt gudem zuluerghele lube-
scher munte myt der bedageden renthe, bynnen lutkenborgh wol to dancke
tobetalende vnvortogert. Des to groterer bekantnisse v. witlicheit v. be-
waringe hebben wij Borgermestere v. Raetmane der Stad Lutkenborgh vorscr.
vnßer Stad Jngesegele vmme vnßer vorkenomede borgere vlitiger bede willen
hengen laten nedden an dessen breff, de gegeuen v. screuen is na godes bord
verteynhundert jar dar na in dem dre vndenegentigsten jare am dinxesdage
negest Bartholomey des hilgen Apostels.
